

Media tidak berani wawancara saya mengenai Memali, kata Musa
Free Malaysia Today
4 April 2014
Oleh FMT Staff

Sekian lama Musa berseorangan untuk mendapatkan keadilan

PETALING JAYA: Bekas Timbalan Perdana Menteri, Tun Musa Hitam mendedahkan bahawa beliau pernah menawarkan diri untuk mengadakan wawancara eksklusif dengan media khusus atas subjek peristiwa Memali, tetapi tidak ada pihak media yang bersedia berwawancara dengan saya.

Katanya, beliau sedar dan memahami ketika itu tidak ada pihak yang bersedia berhadapan risiko untuk bercakap perkara yang boleh dianggap menyentuh kedudukan dan batang tubuh seorang Perdana Menteri (Tun Dr Mahathir Mohamad) yang sedang berkuasa.

“Sekian lama saya berseorangan untuk mendapatkan keadilan namun saya terus berdoa dan akhirnya program diskusi di Kelantan saya sifatkan sebagai anugerah Ilahi memakbulkan doa saya. Ruang tersebut memberikan saya peluang untuk memperbetulkan fakta sejarah akan peristiwa penting yang melibatkan diri saya,” katanya dalam satu kenyataan.

Katanya lagi, beliau sedar perkembangan terbaru ini telah menjemput pelbagai ulasan dan pandangan secara positif dan secara negatif, tidak terkecuali yang berbentuk tohmahan, tuduhan dan fitnah baru ke atas diri saya.

“Saya serahkan segala-galanya kepada ALLAH yang Maha Mengetahui akan kebenaran dan kepada Nya saya memohon petunjuk dan keadilan,” katanya.

Beliau yang juga bekas Menteri dalam Negeri menjelaskan isu Memali timbul kembali apabila moderator forum yang dihadapinya di Kota Bharu pada 27 Mac lalu menyoal beliau tentang tragedi tersebut.

“Pada jam 9.00 malam 27 Mac 2014, saya bersama Datuk Husam Musa adalah dua ahli panel dalam Majlis Diskusi anjuran Kerajaan Negeri Kelantan bertemakan “Politik Malaysia: Dahulu dan Sekarang” dan Profesor Agus dari Universiti Kebangsaan Malaysia berperanan sebagai Moderator,” jelasnya.

Di akhir majlis, moderator telah bertanya tentang isu Memali.

“Bukan niat saya mahu mencetuskan polemik baru berkaitan Memali. Ia dihidupkan semula berikutan respons saya kepada soalan yang diajukan oleh moderator dalam program diskusi yang diadakan,” ujarnya lagi.

Katanya, isu utama dalam perkara ini adalah fakta, sama ada pada hari peristiwa tersebut berlaku, saya menjawat jawatan Pemangku Perdana Menteri kerana Tun Dr. Mahathir

berada di luar negara.

“Berdasarkan penyelidikan daripada bahan-bahan rujukan yang masih dapat saya temui, nyatalah Dr. Mahathir berada di dalam negara pada hari tercetusnya peristiwa Memali dan saya tidak memangku jawatan Perdana Menteri pada hari tersebut,” katanya lagi,

Beliau menambah sewaktu berlangsung prosiding kes dakwaan saya terhadap seorang penulis di mahkamah beberapa tahun lalu di mana dalam kes ini saya berjaya, (ketika itu Dr. Mahathir masih Perdana Menteri), peguam bela bertanya dua soalan yang serupa, sama ada Dr. Mahathir berada di dalam negara pada hari peristiwa Memali berlaku dan adakah saya memangku jawatan Perdana Menteri. Jawapan konsisten saya berikan bahawa beliau berada di dalam negara dan saya tidak memangku jawatan Perdana Menteri.

“Tetapi tidak ada media yang sedia melaporkan fakta ini.” katanya.

“Sekian lama saya dicerca, dicela dan dinista mengenai peristiwa Memali oleh pelbagai pihak terutama oleh parti Pas. Seingat saya, apatah lagi selepas saya berundur daripada jawatan menteri; tidak ada pihak baik daripada kerajaan, begitu juga Umno yang saya anggotai bersedia menyuarakan fakta yang benar,” jelasnya lagi.

Beliau mengakui peristiwa Memali merupakan detik hitam dalam karier politiknya kerana genap 100 hari peristiwa tersebut, Musa Hitam meletakkan jawatan sebagai Timbalan Perdana Menteri dan Menteri Dalam Negeri.

Copyright © 2013 – Free Malaysia Today

Source: <http://www.freemalaysiatoday.com/category/nation/2014/04/04/media-tidak-berani-wawancara-saya-mengenai-memali-kata-musa/>